

LA FAMEA

Quand a nasem
a sem furtunid e a ne savem,
perché avem una famea
che l'è la roba piò bela che ui sea.
La rigala un infinid amour
La dà cunfort me dulour.
L'è un rifug ti mumint ad dibulezza
la suleva quand uiè la tristezza,
l'aiuta quand uiè al dificoltà,
la dà cunseglì a volontà,
la dà speranza quand e per che la sea fnida,
la rinfranca quand u sé in salida.
Ogni dé, ogni mument
l'è un punt ad riferiment.
Zert, un è i sé fezli fela sta famea
un basta avoi snò un po' ad fantasea.
Ui vò anche un sac ad pazinzia, curag, bontà
per cumbat al su aversità.
Se a guardem snò i difit,
perché tent nisun a sem perfit,
mela un vin fura
l'è un mazel adiritura.
Quand u sé inamurid
piò in là di lè un si vid,
ma quand us cmenza a voida lom
di ciul un vin fura un fom,
us stà so la matoina in alegrea
po pien pien lat va vea.
Si fiul mel discusion
perché sopra lo ia la rason,
beghi su beghi e vin fura
che uiè da voi paura.

Ades po'anche la crisi avem da smaltì

e ma tot al chesi las fa santì:
una masa ad dificoltà
e un si sa quand al fnirà.
Quand e mer l'è in burasca
e per che la chesa la casca,
l'è aloura che insen tot do
bsogna tni dur ancoura ad piò.
Zcurend us trova al soluzion
ma tot al situazion.
Se uiè dla vita da campé
quanti batosti ui sarà da pasè.
A voi dì mi tent zomni che i sa da spusè
che in sa mai da scuragé:
l'è l'aveniment piò grand che ui sea
quand e nas una nova famea.
Avoi tached una moi o un marid sincir
da putè cunfidè tot i pensir
e es cuculid
cum'è i raztin te su nid.
Ogni volta che uiè e mirecli da dvantè genitur
l'è una gioia immensa sicur
e se sta soira a sem i qué
l'è perché uiè una masa ad aniverseri da festegé.
Nun assem spusé 35 an fa
e a sem ancoura i qua.
Se do is vo ben
in si stofa da ste insen.
Ogni tent assem da arcurdé che e Signour l'è sopra sa nun,
lò un'abandouna mai nisun,
l'è e faro che guida sla reta vea,
l'è sopra te mez dla famea.